
P R Æ F A T I O.

A P U D medicos plurimum semper va-
luit, semperque valebit Celsi auctoritas.
In ejus enim opere elucet genuina Hippo-
cratis doctrina, tum elegantí sermone,
tum ore facundo dictata. Quod cum no-
cturnâ diurnâque Asclepiadeæ arti studen-
tium manu versetur, de isto fusiùs dicere
non liquet. Unum tamen magni foret mo-
menti, si hîc scriptoris vita exararetur;
sed quæ nostrum spectant, tantâ sunt obvo-
luta caligine, ut quid certi vix proferri
queat. Satiùs igitur visum est illius histo-
riam prætermittere, quàm falsa vel incerta
aut parùm tuta enarrare, omnibusve nota
ineptè repetere. Viros tamen literatos, quid
in hâcce editione adornandâ præstitum sit,
paucis edocere consentaneum est.

Numerosissimas inter Celsi editiones,
nulla sanè existit, doctorum judicio, quæ
omne tulerit punctum. Quot quot sunt qui
tali vacaverunt studio, licèt eruditi, sa-
gaces, ingeniosi, quin & medici famâ
non incelebres, negligentia & festinatio-
nis insimulationem effugere nequiverunt.

a iij

vj P R Æ F A T I O.

Dum hæc ità se habent, operæ pretium se esse facturum credere ausus est vir romanarum literarum amans & cultor egregius, si Celsianos libros summâ diligentia legeret atque relegeret; si exemplaria optimæ notæ typis excusa cum manuscriptis maximæ fidei codicibus religiosè conferret; si diversas & phrasium & vocum lectiones non iniquâ lance perpenderet, ut exindè legitimus emergeret auctoris sensus, spurriæ rejicerentur dictiones, & vitiosè interpositæ deleterentur. Quàm arduum sit & operosum nemo nescit. Sperat tamen editor laborem suum literato, & medico præsertim, orbi acceptum fore.

Celsus omni ævo laudatus, sed plurimis deturpatus maculis, nunc prodit nitidior. Quæ in ejus libris inscitè translata erant, suum jam locum obtinent: quæ deficiunt nonnulla, veterum incuriâ librariorum, (cùm reponi impossibile esset,) saltem indicantur. Periodi malè sæpius intercisæ, non jam invertunt sensum, dum justis gaudent commatibus. Inconsideratè secta paragraphi, sectiones, capita, quæ legentem fatigabant, in novum sed nativum ordinem sunt restituta. Hippocratis

P R Æ F A T I O. vij

verba & hujus inprimis aphorismi, quæ in latinum frequenter vertit auctor, per majusculas à textu distinguuntur. Ad hæc accedunt multa in plurimis editionibus desiderata, typographiæ scilicet elegantia, characterum nitor, chartarum delectus, forma commodior, quæ nostram aliis longè superiorem vindicant.



